

ils me dresserent vne cabane à part, qui seruit de Chapelle & de maison tout ensemble. I'y celebroid tous les iours la sainte Messe, où tous les Chrestiens assistoient. I'y faisois l'eau beniste; tous les Dimanches i'y ay baptisé quelques Catechumenes avec les ceremonies de l'Eglise. I'y assemblois les hommes & les femmes, & les enfans par diuerses bandes à part, pour les instruire. Il s'y trouua cinquante Chrestiens, qui se confesserent à la Pentecoste. Les fatigues qu'on souffre parmy ces peuples, sont adoucies par les doux fruits qu'on recueille de la semence qu'on iette dans leur cœur.

Ces bōnes gens voulās faire quelque distinction entre les iours cōmuns, & les iours qu'on respecte, comme ils parlent, s'assembloient les Festes & les Dimanches apres le disner dans leur Chapelle d'écorses, pour reciter tout haut leur Chapelet avec le Pere; & apres auoir rendu ce petit tribut à Nostre Dame, ils chantoient vn Hymne en son honneur, composé en leur langue. Si quelqu'vn, pour quelque empeschement, ne pouuoit assister au diuin Sacrifice, il reparoit cette perte si tost qu'il estoit libre, par vne priere qu'il venoit faire